

5503.7  
7247  
1930  
v. 6

集賦辭詩

武陵集

卷五

BERKELEY  
LIBRARY  
UNIVERSITY OF  
CALIFORNIA

EAL



武陵雜稿卷之一

別集

賦

存養賦

戴玄規之高蓋兮履黃矩之博輿。審余生之獨直兮  
配二儀而中居。究降衷之孔均兮。謂聖賢之可能然。  
此心之不存兮。孰至道之或疑。矧天理之最奧兮。在  
吾人之闡微。所貴擴於發端兮。夫須臾之莫違。廓太  
公以有定兮。藹萬善之自足。惟能存而能養兮。廼順  
應以無忤。夫固極天以因際兮。豈彼豐而此嗇。蓋內  
直以外攘兮。全厥初之所得。噫。心官之司性兮。若北



辰之樞于天苟一刻之無主兮乃衆賊之伺便試觀  
厥謬之千里兮初起差於抄忽世皆養小而遺大兮  
各蠅營於口腹紛亾心而追難兮羌捨梧而培棘戕  
已甚於溪柳兮牧又濯於山木萌固劫於十寒兮長  
何助於一握勲華儼而欽欽兮湯禹承而允執昌發  
反而祚隆兮誦賴叔以困復赫帝王之異號兮同存  
養之極功逮姬衰而皇閔兮降圻頂於龜蒙詔我曰  
操存兮的我曰中庸開羣矇於千億兮揭白日於大  
空既有此回悟而參唯兮孫又謹獨以得宗化雖愧  
於雍熙兮烈益尊於繼開俄大道之茅塞兮揚墨迹



其淫回聖母三遷以教兒兮挺命世之英才曰存心  
而養性兮入孔室而發揮喚赤幟而建標兮道至今  
猶生輝陋漢唐諸儒之說夢兮孰踐履其依倚淪於  
空寂者謂不可存吾之心陷於虛無者謂須先敗我  
之欽又有鄙於此者異哉訓詁之穿鑿而詞章之雕  
刻也收鮑魚以盈肆兮謂芝蘭不可服夫旣自昧於  
成已兮又何有於成物偉河南之兄弟兮獨發憤於  
千四百年弘存養之大義兮表曾思之遺篇伊辭養  
而動察兮考亭文擴其未發闢四世之誣惑兮功邁  
禹而有赫邈余觀妙於寂感兮惕日新於謹獨投一



寸之東阿兮救萬里之黃河倘惠山之有渝兮要十  
笕而靡他重曰率初賦兮顧明命存吾敬兮養以正  
克四非兮擴四端泯聲臭兮弄我九藹方寸兮虛而  
靈合大和兮保利貞積既久兮妙凝精藏於密兮發  
乃榮獲是養兮存之力葉則萬兮根惟一約于禮兮  
察必誠生能順兮歿亦寧

首陽山賦

三山稱神於區外兮五嶽秩宗於域中夫何首陽之  
聳翠兮擅宇宙之清風試余飛尻輪兮躡二子之幽  
躅對太華以雙峙兮趾黃河之盪激邈高標之雄跨



兮羌衆峭之撐碧春風入谷馥薇初茁身畔悲歌澗  
裏哀筵白日寂寂伊人如昨朱夏陰陰黃公轉木叢  
桂攔枝奔流轉石至人不歸白雲滿壑秋雨旣霽乾  
容載肅溪月夜白嶺旭朝紅昭乎千載如見其忠玄  
冬已閉崖竅雪積萬木俱腓松柏挺立凜然百代若  
揖其節四時遊想使我欽欽夫惟清聖天錫厥心毫  
輕讓國岱重金倫一脫樊綬天下歸仁當商室之如  
燬兮獨垂綸於北海之濱就乃父之善養兮胡厥子  
之秉鉞考雖不慈兒寧作歿苟臣之戾何有君綱顧  
斷姜之昧義兮又况秦闕與散南抗我兩手叩彼之



驂獨立一言伸萬世君地爲愈卑天賴益尊爰采薇  
矣茲首之岑有口不食姬粟兮况受其金一餓空山  
萬古義烈重曰岐山草木皆有慙德首巔雲烟獨無  
愧色彼行其權此秉其常天地有窮未沫其香

鴻門賦

鮑乘輅孤夜哭回首亡碣雲五色皇監觀而假手兮  
盖將紹伊祁之峻德忽斷蛇以入關兮沈虐焰以立  
約彼何人兮擣抗謂天命之力撰兮以谷以席卷兮  
期搏季於一擊幸賴圯上之善謀兮講好會於鴻門  
三千其士百萬其軍衆樂隄雷長戟誓雲博中四海



俎上秦鹿兩雄一筵信手酬酢拔山蓋世爾武絕倫  
旋乾轉坤我智如神重瞳閃爍隆準銷魂叱咤秋厲  
唯諾春溫主客醉酣虎踞龍伏示玉璫兮太急舞霜  
刃兮太迫或市恩以掩翼兮或仗義以引危惟簡在  
帝之心兮夫何嗾譙之支離固衆目之昧天兮莊子  
房之告急豈神謀之不及兮抑注金以內惑倏眞人  
之舉臂兮托杯勺以致辭餌餓喙以得脫兮非人力  
之所爲不然則項氏之殘賊兮視其君曾不如老畜  
豈於沛也獨有君人不殺之度也甚矣居巢之老兵  
兮撞玉斗兮誰怒以白璧之一雙兮易炎祚之四百



後千載而歷茲兮益有感乎仁者之無敵也

白雲洞次朱文公白鹿洞賦

肅承恩于玉階兮宰興州之舊疆念孩愛而長敬

兮孰云初賦之無良咨晦軒之故里兮悶襁絰於硯

塘

硯壘池今廢爲水田

泝竹溪而窮源兮仰小白之菟岡倚若

人之純美兮揭日月於洪荒饗禮朱而望孔兮顧食

菲而飲芳納藏獲以衛道兮勤一心於我庠顧余學

之杯潦兮夙有志於望洋惕雞鳴以孜孜兮法健行

於天運諒盈科而後進兮夫固原泉之混混苟得依

乎中庸兮亦甘心於行遜跂前脩而僣勉兮慨無及



於答問矧克配於宣尼兮與羣第而同進惟 聖朝  
之致享兮逮州縣而無倦夫何里社之闕祀兮俾遺  
愬於來孫年二百又四十兮悅親承其緒論訪宿水  
之古寺兮認當年之讀書白雲橫而如昨兮至人履  
其楷模步廢礎而延佇兮招巷老以是諏晴峯軒眉  
而獻狀兮幽澗舍瑟而爭趨喜立廟之得地兮樂書  
院之繼圖彼章甫之波從兮沛如水之安渠息不集  
乎農時兮懼日月之其除想白鹿之經營兮心萬古  
而一符改洞號曰白雲兮夫我事之或集儼廟貌之  
煥赫兮又遺像之迎入溪有毛兮山有柏兮庶邊豆

之可給結幽蘭以欽欽兮悵絕緒之誰緝闢堂壇以  
藏書兮冀有補於講習水泚泚其不舍兮山巖巖其  
卓立豈柯則之在遠兮惟一德焉允執譬清潭之印  
月兮又孰可以手拾亂曰晦翁晦軒貢一璆兮洞入  
白雲剔繁樛兮廟可薦嘉堂可游兮山高水長偕止  
流兮以俟來哲復何憂兮惟能與安匪所求兮

釣臺賦

口占

訪子陵於七瀨兮聊延佇乎石紅山謾謾以起予兮  
波亦迎我而春撞一絲而扶漢九鼎兮吾固知雲臺  
釣臺之難雙夫惟先生之有方兮尹之任可以獨扛



顧帝德之非湯兮安得挽回古道之淳龐一笑烟波  
三代其腔寧堅節於漁釣兮涇渭不可以同缸客星  
已動於天上兮擬相猶問其爲邦還把舊罕臨水何  
懽懽顙獻喜懽瀨瀨瀧清風宇宙獨豎標幢榮華暫  
時事兮知先生者前有其山之許後有鹿門之龐歌  
曰富之山兮桐之江烟冥冥兮鎖蓬窓一揖荒臺我  
心卽降

何必曰利賦

周之衰爭者七角以力惡乎一梁招賢惟利曰孟敬  
王仁義說彼何必此爲切如交征國乃滅自無敵人



可伐吾仁施天下悅我義行四海服姬由豐湯起亳  
其誰禦若河受指諸掌昭厥福反謂濶而聽貌痼于  
利大梁覆孔罕言湏是塞不有君子孰知其酷猗與  
聖規萬世之惕

辭

鳳羽十章章四句

醴泉鄉校歌謠

鳳飛有羽其羽祥兮自天銜瑞圖鳴我岡兮  
鳳飛有毛其毛禎兮自天銜瑞圖儀我庭兮  
鳳飛有聲其鳴嚶嚶兮自天銜瑞圖集我堂兮  
堂有玉矣臺有柏矣允矣君子如圭如璧



承其綸矣維其貞矣執其衡矣維其平矣

試之湖城莞其琴兮詢于畿甸洪鐘其音

難立之南辰韓舊城經洛中注海爲極兮

海之濶矣 聖恩之汪江之水矣公澤之洋

勉勉我公維其仁矣維我有師我 王有臣

我 王有臣維我有師樂只君子維其時矣

詩

義田

一人之身分爲弟兄譬如一身十指是生衆指相軋  
痛在一心伊子胥訟親豈安襟生割五內歿泣三泉



藹藹四端無間愚賢嗟嗟是輩胡不顧魚謂泰山輕  
所爭者錙銖歟秦氏曰晟其名初無學問天錫至誠  
能以禮讓情見于辭太守淚落羣季含悲憫其義窮  
官給以田天助神降有慶綿綿種之以德其收必豐  
豎一片石銘萬古風

次石川四言韻

髮本有垢貴在日沐巾本有纓貴在日濯日日新之  
我亦何憂聽松有人請與子共遊友林意我亦二字  
括出我亦人也之  
意聽松堂成守璠別號石川  
云欲見我而去故語及如此

雙鵲



有苑者林雙鵲朝驚四方上下扣翼哀鳴余恠其故  
呼婢問之婢曰小奴攬其一雛余駭且怒掩卷太息  
奴曰彼雛繫在土屋余喜欲放出門孤立雙鵲來前  
以喙啄木聲貌孔苦愴我耳目余取其子解其纏微  
兩手高捧坐于故枝雙鵲亂啼遶樹而飛余於是喟  
然嘆曰初之哀鳴固訴余也後之亂啼豈謝我耶世  
無冶長誰知汝意鳥乎鳥乎余亦喪子彼造物者不  
可以訢兮抱淩冤而長嘻

送李存吾之長沙

蒼蒼鵲嶺松千歲經風霜泠泠林淵水綠淨曝秋陽

山河五百年正氣鍾鐵腸  
如丹穴鳳口血鳴高岡  
哀聲撼九天老梟驚下床  
擗雲翳乾顏滾悶白日光  
之子遠行邁淫潦恐霑裳  
遙遙路一千驢背載綱常  
今日憇何郵明日宿何鄉  
善人國之紀一去脉必傷  
衰淚非私墮蒼生今失望  
藝祖福未艾社稷豈空亡  
老賊死有日聖主年尚強  
毋傷漢誼鵬休賦楚原  
章天若造國家夫子還廟堂

雪中寄裴太冲

去年訪吾旅今年訪吾村  
年年君訪我我獨未訪君  
有病卽苦痛無病長紛紜  
弄我者何物不得窮其源



前者偶仍事驅馳東北犇盤回數千里三度經君門  
君門不可入我懷空如焚君看武陵雪遙連鷺山雲  
江水隔其間日夜常沄沄欲知相思處請君臨江濱

董子下帷

白日暗尼丘六籍又灰飛哀哀馬上翁安事書與詩  
卓爾董夫子默坐爲垂涕辛勤討聖經三年長下帷  
分陰尚可惜奚暇園中窺孜孜孔顏志悶悶虞夏思  
發憤輒忘食恐失如有追學旣博而約業造精且微  
灼見出於天判然知所歸正誼不謀利明道寧論私  
一言尊周公萬古夷吾卑三策竟矛盾茂陵眞外施

祇令吾道壽不容亦何悲衛霍貴一代未免千載譏  
伊人老江都到今稱不衰持此豈易彼必有能辨之

偶吟

早年學長劒壯氣衝青冥區區七尺軀互懷萬里情  
誓將霜雪刃爲君除棘荆北繫酪漿酋東滅斑衣生  
大揚一斗膽盡忠事聖明遂令百萬人鼓腹歌太  
平衅干藏虎皮千載無戰征然後歸田園還驅吾牛  
耕不爲赤松遊不爲塵網縈悠然畢生涯不釣萬世  
名

燈前感懷



聖主撫三韓大東仁化覃至治妙域北直與天地叅  
我生亦何爲得此恩波涵文字日披尋閉門思耽耽  
浩浩興無際東西與北南長嘯憶萬古幾箇能是男  
驅馳萬里途安可以停驂丈夫百年志豈但慕纓簪  
達士所趨義宵人惟利貪度量隔天壤何以同年談  
君子毋自欺蓋棺亦無慙

長安一片月

長安一片月徘徊於牛斗夜渡虛閣迫獨坐哦詩叟  
開燈吐虹蜺筆底龍蛇走何人持酒來柴扉月下扣  
浩浩百念空萬事安可苟終知物外遊無譽亦無咎

月中倘有仙我欲一揮手狂當吸南溟何止吞八九  
失題

八月十四日曉起搔短髮水師欲餞我我行不早發  
東軒設小酌陸海珍滿盤榮慰非不至煩抱誰能刪  
悄悄忽忘答熱淚時橫潛伯胤真可人頗解余之傷  
借我飛青驄據鞍生輝光高絕嶺云險歷越追雷忙  
是日朴栗浦亦同吾而行青林解鞍話碧澗聽寒聲  
悠悠古今意磊落天地情馬上一相笑揖別相忡忡  
彼行向其浦我行向山庭山庭舊識僧迎我相欣之  
摘菜飯夏香亦足充吾飢開燈佛閣虛泚墨題新詩



送尹內翰曝史于星州

侃侃尹太史滿袖華蓋香螭頭運彩筆天地爲輝煌

萬古東方乘三年曝秋陽宮中一客星此夕指南方

鳥嶺千岳秀龍湫一派長棧鬼棧險猶懷麗橋殘尚憫

唐金庾信行過沙伐國歷吊甘文王鳳溪吉再水空

咽孤雲卮山舊遊雲自蒼遙望百雉中高閣簷秋光寶書

披一一聖謨悅洋洋奸諛誅白骨潛德闡幽芳山河

數雨露日月肅風霜採風作家史得句富錦囊神馬

登方丈飈車訪扶桑回首武陵縣桃源是桑鄉書遊

還可樂謁墓涕應滂傳呼天上郎觀者定如墻請看

雙亭洞接屋竹林莊倚門雙白髮優是我爺孃為報  
兒不恙聖恩浩無疆

送戴孀大歸子陳

黃河夜淩堤旭日波中淪我欲伐淇竹梯空訴蒼旻  
彼蒼不可訴我罪難重陳可憐楚丘樹青青為誰春  
差池玄燕羽交飛如慰人嗟我永負子子寧負余身  
吞聲送之子血泣空沾巾望望曲阜路誰令膏爾輪  
早知塞淵心亦有先君神相離莫相哀有死當相親  
送四皓還商山

四仙騎四鶴高翔白雲山四鶴與四仙皎潔同其閒



白雲有去來先生無往還紫芝滿澗阿夢不入秦關  
忽聞漢道盛白日下人寰儲皇生羽翰天子爲回顏  
清風巢許上功與伊周班欲留補袞闕恐爲白雲訕  
還騎四鶴去商畝渺如鬟白雲喜相迎蒼生其奈艱  
嗟我有兩手冥冥不可攀他時憶四仙空望白雲間

和陶淵明雜詩

堯舜陟方死周孔松下塵茫茫大瀛海寄此稊米身  
聖賢不可追經史聊相親不才慙明代無德愧四隣  
時斟一尊酒嘯詠太平晨清風竹樓上我亦羲皇人

丹穴雛送蔡壯元并序

蔡壯元居敬氏居大學一年將歸寧告行於  
東西舍東西舍皆愛惜其去而不得留乃合  
辭而言曰是河蕃也以不得閉舍爲恨商山  
周某聞而解之曰蕃當德宗時入大學二十  
餘年不遇而去是固爲澤而不爲川者也居  
敬氏居大平之世抱不世之才其遇也有時  
非川而何今以蔡與河爲一去就而有動於  
斯人者豈真知居敬者哉遂以丹穴雛一章  
贐壯元南行

嗟爾丹穴雛彩翮何時長遙遙覽德輝經年止舜庠



衆鳥懷好音日夜參翺翔天寒竹實稀有母不得將  
怒然戀故巢引吭凌風霜衆鳥爭啾啾請留王者祥  
留之不可得吐血成圭璋去去嘶圖來大鳴時俗康  
送公佐下第南行兼勉從弟子翰

嗟君有遠志抱才不得伸歷落向南天我懷寧有濱  
漢之柳弄色嶺之花笑春瘦馬一千里行行屏裏人  
望雲尚慰思高堂况寧親臨池贈金鯽滿盤銀絲新  
父母載怡悅兄曰余季純中天地而立此樂誰爲倫  
人生不滿百事業當及辰大者爲一世小者爲一身  
其間秀出者爲萬世生民所學有滾滾天賦寧富貧

三者君請擇暴棄卽不仁班馬雄猶健孟韓浩以醇  
文章是大路勇往毋逡巡子翰暗於大此意君須陳  
與宋眉叟共次東坡韻

蒼茫大地濶羣山圍龍蛇銀河天上來仙洞何年呀  
已入蓬萊境何須博望槎近江白練直遙岑翠髻斜  
蟾宮在咫尺玉兔未應遐何方借靈藥一壽億萬家  
送元壽甫以質正如京

元侯十載前長嘯臨南溟歸來富文學一劒動精靈  
楚穎物無隔虞鳳潤王庭明主重事大嚙命朝  
天廷萬里燕雲路三韓一使星鵠鴨看一眼遼鶴亦



應聽季札入衰周其樂尚復聆何況 聖天子至治  
四海馨禮備樂亦全文物邁六經柱下有其人爲我  
問丁寧東還奏 玉陛金石亦可銘莫言關山遠四  
牡正駟駟

送許磁之以咨文點馬之西京

湯湯沮江水萬古其色澄王儉降戊辰文獻已無徵  
可憐殷太師寂寞有古陵當時八條教遺俗到今稱  
如何四十代有孫竟無能燕馬夜飲江舊業如破甌  
阿瞞亦何爲再傳禍相仍聞道朝天石東明自此升  
麒麟雖有迹怪語固難憑可笑蓋蘇文積惡不自懲

孤城抗萬乘促滅反驕矜顛覆其宗社糜爛其黎蒸  
此地入新羅翻爲麗所乘麗王惑異端履霜昧堅氷  
五色一孔餅四條白麻繩誰撰白頭文恨不折右肱  
大憝雖得討厥穢已難勝王氏自太祖垂統尊華樗  
果然五百業零落一妖僧彼蒼者同覆一視誰愛憎  
爲善與爲惡自廢亦自興吾王諒天縱聖德同日  
昇玄化妙訣北庶績今其凝一心事皇帝畏天常  
兢兢正朝與聖節此禮自有恒其他慶吊使首尾  
亦相承槐院治文書細字中藏稜自非筆入神其任  
不敢應落落孔巖後眼如九秋鷹入城突未黔再縱



關西韜多材自勞苦退之豈虛傳前行歷兩京統軍  
亭上登長嘯向西北斗間青虹騰歸來捲萬狀磊落  
服其膺心懷濶江海意氣壯飄凌飲酣吐珠璣一筆  
盡溪滕今晨又登程所得應日增平生經濟學十年  
對一燈事業許憂稷淵源擬顏曾寧穿劉又夜肯擔  
虞卿登賦蔑嵇中散詩輕王右丞青瑩芙蓉劍豈獨  
刺彫旌彩鳳下丹霄本意爲仁烝弘者固難毅毅者  
固難弘而子有二難豁達無溝塍冥觀洞古今一嘗  
辨滄漚懸知采興亡新什題縑繒他時獻玉陛並  
許裁金縢往歲籛雲繼嶺外聊避矰潛珍九淵下何

者能加習我生在海陬二十無友朋逢君托懷抱悵  
如附驥蠅花山錦繡紅石池明鏡潏君唱我爲和我  
言君爲謦怡怡對一床寒暑幾相曾常懷片曝志共  
憂祀天崩幸忝壬午科頗自愧先陞前春君繼登名  
望屹千層我實井底蛙君如天上鵬所見有小大何  
異楚與滕君文日以肆晴晝霄軫軫我學日以卑佔  
畢事秋蟬安得乘飛車橫跨衆峻嶒鵠嶺吊孤松湏  
江采紫萸歸見市上兒不啻羣飛薨臨分重黯然搔  
首雙鬢鬢西去常早寒風雪互轢較絕景雖可翫高  
樓不空凭嚴程計日月勿待屢環絃况學寇萊公嘔



啞費東綾

對江

朝吾對江吟暮吾對江食朝朝與暮暮長對澄江色  
對江亦何好好在人不知默會活潑妙因究混涵德  
觀水固有術一本浩無極夫子亟稱水其取門人惑  
軻也本知言解道流不息寒暑相往來日月互盈異  
天行如可息四序錯其職氣稟有所拘物欲有所賊  
人道如可息山徑終茅塞所以古之人至誠竭其力  
堯舜非至誠無以撫中國周孔非至誠無以造聖域  
君看江水流滔滔萬古未嘗停一刻若停一刻波瀾

枯魚鼈陸死誠可惻歛衽拜江真吾師題詩請爲天  
下則

次宋睂叟次東坡次韋蘇州韻

夜寂月滿湖高樓三兩客玄鶴掠檻櫺白雲生砌石  
笑把水精杯僂道瑤池夕捨瑟興悠然門前無俗迹  
讀東坡詩與睂叟同賦

大雅一寥落乾坤久昧沒西京綴五字譬如學語齷  
漂流逮魏晉委靡亦可咄淵明詩中天自然萬卉發  
子美詩中聖叩其端而竭太白詩中仙飄飄謝銜檠  
退之詩中海大風駕溟渤東野詩中山千巒競硤砢



樂天詩中路萬里無繇翫柳州剛而健去肉只留骨  
樊川崛以奇大洋豎孤碣吾觀八子詩萬古信超越  
然而嘗擬議其名猶可揭及讀子瞻詩慙難窺其閥  
白路騁逸驥韓海馳大筏槌碎東野山簌弄太白月  
嘯傲元亮天因入拾遺關子厚牧之輩駭汗堪結韉  
當時歐陽子詩壘亦突兀一見避一頭終爲迫逐歿  
黃陳望倒影走僵徒病暍搏虎誠已難捕龍嗟手滑  
萬變難名言到此吾欲訥

閒居用東坡韻

虛室寂生白其嚴十手指誰知毫釐差謬已至千里

夫道一以貫吾聞諸夫子後世眩精粗學術仍表裏  
萬古守此性只有門前水吁嗟百世下罕言仁義美  
次報眉叟三首

今來八句詩貫四十箇珠投之暗夜中足以分錙銖  
至哉君子贈一一起懶夫以此還望君吾言豈諂諛  
虛靈應物地不昧有明珠一墜濁水中低昂暗錙銖  
須知天所與一而已矣夫君子與小人正直與奸諛  
十四日 肅拜辭 闕下朴子雲筆二柄柳士  
仁筆一柄為贐宋眉叟以詩為贐到良才驛次

酬



納納乾坤內悠悠去來今東望極扶桑西眺窮鄧林  
人生一糲米萬類本同衾如何千億載乃此少知音  
嗟我固多幸得與君共吟一入芝蘭室長許醇醪斟  
寂寞對一床萬古會兩心步月或詠懷登樓時攄襟  
君文日大肆溟波涵以淫潮勢自舂撞麾之不可禁  
疲繭亦何爲衰病亦難任憂患慣一年兩鬢霜華侵  
闌干淚未乾義和走駸駸一點古驛燈臣子意交深  
故人贈遠行異乎珠與金驅馳萬里途當勉君子箴  
旣酬金都事叔藝復走筆求和

七月十四夕長空雲似掃獨憐十日雨洗出萬里昊

玉兔俄騰精入戶孤光早孤光何似者使我心酷好  
舊樓起徘徊磊落平生抱忽憶王子猷孤舟訪安道  
長安百萬家方寸向誰倒嗟君羈鳥姿維德是芥藻  
神入右軍筆腹儲子安藁僑居暫卜隣不食亦為飽  
夜久步敲門入門月浩浩迎携但一笑地坐惟心討  
啗我麒麟脯薰我芝蘭草飲之以醇醪遺之以至寶  
歸來大醉卧不記日杲杲

送金進士應明南行使呼韻賦之

濟川當用楫理病當用藥大翮因風奮神劍無人躍  
裴翁七尺身早負經濟略文章自卓越道德久開鑰



乾坤入橐囊屈伸如臂脚由來天下士厥志初落落  
雄筆駕斑馬風雨來受約沛然會凌河誰能竟為澤  
況今運千一聖主撫東洛日月再昭晰天地再開  
坼翩翩五彩羽巢向軒轅閣雲漢之為章鳶魚妙化  
作萬生舞恩波君胡獨惕若去非愛山野留非戀官  
爵進退綽綽爾萬里無束縛腹中五車書行載一頭  
駱揚鞭出鳥道欲喚孤雲魄雅興南海濶高義秋天  
廓臨流膾銀絲入園泛金萼柿栗紛可拾芝蘭應滿  
壑白雲鎖松林何處尋孤鶴

八月十三日夜步月訪宋正言翌日以同心之

言其臭如蘭為韻賦之 效山谷

秋雲捲萬里月色天下同  
褰衣步中庭若挾舞雩風  
忽念宋拾遺一嘯萬古空  
夜久叩其門相看意已通  
碧天本無塵明月如有心  
寥哉千載下試聞白雪音  
調高和者寡但抱無絃琴  
小兒唐李白大兒晉陶潛  
吾師欲東浮李耳又西之  
於道有精粗其志同傷悲  
我輩獨何事生逢堯舜時  
共收渭川釣誰採商山之  
君子腰束韋常恨不得言  
得言又有待多被旁人論  
獨有宋廣平鐵膽照乾坤  
從今玉殿下日醉白獸樽  
玉露湛晴空金風斗淒其  
白蟲夜相號不平者何為



長安穀翔貴萬口同啼飢秋歛尚如此春來良可悲  
志士急流芳宵人慕遺臭經營兩幾何瞥眼古今宙  
大賢所憂異爲天下瘦可憐孟氏子三宿而出晝  
蒼生望謝安謝安當何如顏回問爲邦夫子意有餘  
不遇亦遑遑遇有姑徐徐丈夫百年內所以惜居諸  
斯人早種德猗猗九畹蘭我生若蝴蝶尋香數往還  
吾聞周道盛鳳鳥鳴岐山赤驥日飛步跛狎安可攀

次子瞻和子由論書寄李季子淨并序

昔李陽冰真蹟爲同里客所易舒元興讓之  
曰今人重李斯之跡以秦古而斯邈也向使

秦斯與子比肩子能貴之乎水之書亦願刻  
石作篆備書六經號爲大唐石經老不得伸  
其志飲恨而死今君之奉 命所書歷代君  
臣圖像贊引已刊石行于世其 殊遇視水  
何如也然同里客之不以秦斯視之者固多  
矣遂次子瞻和子由論書敬呈足下兼諷同

里客

善書莫逾君拙書誰似我守拙雖云惡好善斯亦可  
君書誠國寶粹美無玷楮祥風朝朝翔遊雲暮暮娜  
力若盪舟鼻堅如守壁願長戟森植陞懷劍初發裹



萬變隨手生精妙貫么麼石經早傳世已重平生荷  
談笑降鍾王不勞聊城筭一字價無敵百金何足夥  
文章又日斜多才自不情憐我愛書癖灑翰頗起跛  
蟻蛭各誇雄崇華拔鬼駭萬事例貴古俗計由來左  
送友人下第南行

萬鍾何加焉富貴如浮雲由來賢哲士心上涇渭分  
固知野鶴姿一望超雞羣安能久貧賤白髮守典墳  
吾相如臯夔吾君邁舜文去去早歸來爲我揚清芬

書堂有感

湖山直矗白雪湖水環青玉瀟灑山水間  
勅賜讀書  
屋此地非人寰此景天下獨霽月滿高樓光風動階  
竹琴彈千古意窓開萬里目呼取水精杯泛以黃金  
菊我輩且非鼠豈但耗彼倉中穀  
聖恩重於山深  
於水寸心唯有秋陽曝

漢渡次山谷韻送崔施之南觀

四海崔學士風儀魁且偉長不滿八尺腸撐千卷史  
發憤追聖哲勇往不知己玉堂有此人獨爲邦家喜  
昨宵夢倚門畫錦向鄉里天生丈夫身忠孝雙全美  
由來居近密豈但利筆紙余猶潏淵臨君實薄氷履



一杯湖上別兩心淡於水可憐世間交滔滔餘與耳

朝起偶吟次晁無咎韻

熒熒青燈輝悠悠冬夜永床頭一炷薰心上千慮靜  
肺渴欲汲泉綆短汲古井誰言顏氏樂不及終生請  
優游以卒歲於計亦云幸假寐夢姬公霽旭出東嶺  
以山谷蛟龍得雲雨鵬鵠在秋天之句分韻寄

隣哉

栗亭有佳士醉墨騰黑蛟窮居南海濱明月爲神交  
一飲百榼空養真卧衡茅猶勤三釜供恨無粘日膠  
得之若固有不得不熱中文章自娛戲爲藝抗屠龍

開樽竹林下吐嘯成長虹  
考槃有此人誰歌桂樹叢  
功名夢裏蝶夢覺竟何得  
伊人酒中仙風雅繼三百  
長歌北山裂洗硯南溟黑  
放浪形骸外笑殺悲絲墨  
富貴不可恃起滅南山雲  
誰知大梁人耕種信陵墳  
平生毋自欺足以裕後昆  
古來賢達士何必勒殊勳  
烹茶漲谷雲醉酒排簷雨  
寂寞黃卷中常與聖賢語  
吾黨有李白軒軒若霞舉  
塵纓儻可拂海上共搖觴  
白日中天明魑魅不得妖  
阿閭集鸞鳳未見鷗與梟  
君筆力挾山北海猶可超  
何年蓬萊宮獻賦子美鵬  
我非孔文舉何由薦一鶚  
三年不芋食未逃齊南郭



君文天下奇不類爐頭作合置玉堂上安能久淪落  
世人弄一掌雲雨苦多態落窅又下石管鮑今安在  
皮裏有春秋何用觸邪豸他年買浦水乃我七里瀨  
吾聞希有鳥一鳴三千秋亦有黃河水汪洋萬古流  
何傷斥鷃笑有本斯爲優所以簞食樂睥睨萬戶侯  
白頭邊孝先竊廩腹便便接來世間事度以心中銓  
愁如作繭蚕吐絲還自纏懷人不相見悵望東南天

池上吟次友人韻

金風塵盛暑日夕池上行水色淡如油坐愛徹心清  
海月來照之一鏡正空明兩岸石髮香夜涼寒靄生

對此樂亦在何用事浮名

龜山

龜山多秀色奄魯空結陰緬懷短櫓公茲地封子禽  
父文而兄武姪王恩不任何曾有驕吝吐握道彌欽  
聖教垂宇宙光明如日臨傷哉政下逮三家恣朋淫  
乳臭輕柳下雍徹高堂滾西郊麟折趾仲尼泣霑襟  
誰開季孫腹暫為顏回心

扉琴

長安老嫗家兩板古桐扉一板弊為新一板存無幾  
嶧陽幾百年石上飽風霜飄零入紅塵歲月如電忙



過門日千萬無人暫回頭知音獨明日夜夜照孤愁  
誰謂博物子一見涕洟洟披以紫絲絃歸之白玉堂  
一彈挽三代再彈回虞唐三彈卽太古浩浩旁無疆  
物生固在天物遇良有時願言薦郊廟坐使威鳳儀

水精杯

千年白水精團結如明月炯炯絕代寶獻不待三刖  
謂水不可流謂玉若無形持以翳兩眼毫髮分丁寧  
良工一運巧剝中作酒杯豈啻瑚璉貴不足語金罍  
皆言此物貴王府同關石先王寵詞臣九天下榮  
錫當時諸彥士感激涕交頤裹以綠文錦盛以黃金

臺由來清不汙況是虛能受各願德其物永世思勿  
負鼎湖龍去遠喬山鎖烟霧吾道中淪喪茲器亦不  
遇白日再開霽文明煥如昨書閣映東湖中使時駕  
鶴紫醞忽滿斟未醉先飽德咫尺望霸陵舉杯重惻  
惻

小池次友人韻

小池如明鏡湛湛不受埃夫何方寸內萬里天恢恢  
幽人愛清姿逸懷誠難裁携簞下書樓躡屐池邊來  
源泉激激鳴詩興爲相催清風動碧鱗明月照蒼苔  
寂寂心似水夜汲便忘回誰能知此味永與子徘徊



送子弘下第南行使西韻賦之

尊公四海士宇宙名不磨看君想儀刑才力聳山河  
我生百年內取友非不多未見青青松半是天天花  
援琴北窓下對月久咄嗟晚結歲寒盟獨憐爾蹉跎  
秋風千里別葉脫奈如何

湖上夜詠

四山動暝色紅日下海口青天墜長江手可拾星斗  
好月從東來照我罇中酒萬頃瑠璃窟白露滴瀏瀏  
肝膽盡冰雪飄然馭氣母汗漫若遺世欲喚喬松友  
奉次李相思家步月清宵立分韻

騏驥日千里跋鼈安得追  
鯤鵬搏九霄微鳩何所思  
巍巍隴西公一身任安危  
東巡布聖化顛沛期扶  
持固知社稷臣自有帝王師

山甫出東藩其德先柔嘉  
宣風似周召博物邁僑華  
日邊應有制閣下已生麻  
遑遑事驅馳反類魯東家  
孤忠天所察大言豈是誇

亶亶容齋老調元降雨露  
兩虎與三鳳天倫誰最怒  
棠陰展西東聖上忘煩顧  
春秋易代序公猶戒逢  
暮白日照赤心懸懸憂國步

明公命世才片心如日月  
肯數荆山人一玉三見刖



風雲際會姓名兒童識繡衣耀一方令德空百祿  
儒林仰楨幹餘子空碌碌

玉節並海巡萬里波瀾清赤手掣鯨魚錫我以瓊英  
再拜十襲藏珍重古今情却恐六丁取中夜雷電驚  
譬如撞鉅鐘天教鳴太平

周穆一陟方千載無奔宵熒熒多淫哇大音何寥寥  
罷牛與瓦缶擊廟之是繳所以避世者山中遺一瓢  
三復相公詩掩卷令人悵

積雪沒腰脚請效程門立而我亦何幸遠來陪講榻  
不敢和高詞且臚平生臆公心如秋空曾羅二十八

坐看回春風雕鏤盡百物

奉贈古寧鄭使君

元男

使君貌如鶴吏隱栖路塵高情薄雲漢到此難爲賓  
文詞與墨妙三者俱入神敢道吾生晚居今見古人  
伽郇頂上井

古井綠無苔湛然波不起誰言萬仞岡戴此清冷水  
先酌脩山祇禮古誠亦旨一畝令神醒再畝沉病已  
三畝通仙靈欲躡玉喬履我欲挹此水酌彼李集子  
庶回小人腹以爲賢者耻回首叫孤雲曜靈迫濛汜  
武陵洞小樓次裴任韻



君詩如丹霞片片散成綺我詞撫陳語未免還衣被  
老壯力不敵連兵猶未解願君勿誇雄所貴直在此  
余罷官南來已兩月門設雀羅寂歷無與晤語  
一日釋者玉寶玉鍊智川惠旭四上人同來相  
訪各持軸求言余病不執筆久矣不得爲別什  
以贈合成一篇以答勤意使姪怡分書四通而  
歸之

寶師名玉寶所寶在圓寂鍊師名玉鍊鍊亦不在玉  
川師心如川智流恒不息旭師能普照便如海上旭  
四師同祖佛靈源俱淡泊我欲冠爾顛嗟嗟非爾學

爾欲聽爾語就我無奈惑率然成小詩分贈情亦篤  
他年再相訪以此為面目

五月二十九日坐官廳極炎鬱衙罷見任潤德  
恒侃于博古衙東軒晚涼始生怡然有得使任  
呼韻執筆書之

仲夏月又邁餘日只有一盾炎酷如炊坐甑不可逸  
心神倦欲委四體還股栗火雲屯成圍煩鬱轉敲密  
小吏鴈鷺行流汗當午日太守厭升斗簿書計初畢  
衙罷如脫靴欣然訪書室爽氣逼拄笏西岑看齒翠  
好風又從南蒼狗紛見霽顏生請四勿展禽空三黜



人生各有守進退誰得失呼兒且呼酒不詩卽有得  
富貴空中花愚者或自必曲肱樂亦優所以貴儒術  
千駟竟無稱一瓢名不卒安得河漢水濯我錦萬匹  
書之古今懷合禿千兔筆秋風賦歸去永矣老蓬蓽  
與李公毅同登齊雲樓大醉使呼韻賦之

衙罷若脫靴乘風飛上樓故人李謫仙許我携手遊  
海雲挾腥雨溽暑摧不留狂歌試痛飲白鳥起前洲  
開燈且盡歡莫問歲月適醉筆怒吼雷揮寫良有由  
曲肱吾亦樂富貴如雲浮

伽倻山

東國多仙山伽倻固無雙試入海印寺手排碧雲窓  
千峯疑盡出萬壑響淙淙我欲弄玉簫碧海為酒缸  
攜手崔孤雲共吐平生腔空懷焉能果淚瀉如長江

上禪

上禪年八十碧眼似秋溪自說百無知萬事迷東西  
十二入招提十三薤顛毛廿二遊諸山行脚不知勞  
掛錫毋後松次參曹溪師師名是法崇於佛遍能知  
其學有體用靈知與空寂獲受靈知宗為妙卽太極  
太極發於用無極乃其根太極可以語無極難形言  
平生做工夫安閒此為樂又聞惠梅師說道白雲岳



問法亦無他頂禮師如一遂入頭流山一寒居佛日  
東遊歷佛國超躡清涼剎洗衲五臺瀑觀心楓嶺月  
踏盡衆峭後香山久面壁一來此山中三十又三年  
掃除世間事念佛以守禪言庵而學幻坐睨堪潛然  
記此豈爲詩欲曉愚者傳

海印寺贈金韓二君

我生久羈馬紅塵渾白頭向在丙申歲濯纓此溪流  
邇來幾夢想今茲續舊遊楓林然萬壑擺我區中愁  
富貴於世間豈帝行雲浮愚夫昧形役勞生春復秋  
誰能謝朝簪結茅山阿幽故人金與韓骨格真仙儔

早慕孤雲遊托契依林丘風情付物外意氣遊十洲  
邀我七星石此計良有由酌酒侑我醉狂興浩不收  
萬事信蕉鹿何物非謬悠我欲入江海散髮友羣鷗  
懸符就城市恐爲青山羞永與二君約斯言非外求  
聊爲桃李贈莫惜金玉投

鳴巖

在月灘得巖字因與仲舉阿怡同賦以字

少時下月灘不解賦鳴巖白頭始問名令人愧阿咸  
我欲妙萬物陸海和淡醖誰能效愚公移山窮至誠  
茲巖在江心萬古蒼苔緘屹然柱頽波所貴寧有瑱  
霏霏噴爽氣半腹烟雲函恨爾不在山白日蔭檜杉



胡不去巫峽執女手摻摻不然青兗間可助俗品  
胡為挺此江反類屈遭讒波底多險石索食江神饒  
昂頭向碧天美爾能脫銜我欲補天餒須先斲爾巉  
騰身奮兩臂一舉掃星攬歸來過江水天風吹滿衫  
冰夷亦相賀爲我舞裳綵然後水中石一一盡除芟  
永使江流順片心天實監雖收汝殘片足爲世礪礪  
肯效市上兒得失悲荆凡一杯戲作詩中江聊舉帆

夜歷神勒寺宿迎賓館次陳簡齋南山韻

我愛邵堯夫卒歲無皺眉非無桃花源清泚濯吾肌  
尚夢終南青不忍僂長辮西來泊驪口萬象攢吟髭

覽寺暝鐘徹寒山寧擅奇中宵耿不寐宇宙入支頤  
茫然遺蹄筌何異迷具茨一宿迎賓館永洗人間悲

仙人巖

碧江行欲直好山橫護之晴沙白於鷗不動鷗誰知  
仙巖故效奇入江迎我空萬象各有態如索老翁詩  
老翁愧才盡白髮千丈垂不有江夏筆定被江神欺  
小姪散咬唾珠璣隨風吹茲行未寥落千載亦一時  
回首夸巢子爾生令人悲一笑烟波間喬松當有期

寄琴進士大任

世人求神仙不海必於山吾謂真神仙乃在城市間



一塵不起念白日居常閒君看琴大任獨有冰雪顏  
清風生蕭樹土階蒼苔斑商聲出金石門外青山環  
蕭然脫區內悶我如龍鵬相逢屬之酒痛飲無流澤  
流鶯語空亂有片扉常關相思不可見海月頻回彎  
冷冷白雲溪赤足要臨灣此約久成虛此情何時刪

### 南溪送客

嘉靖甲辰歲韶華三月天送客出南溪長風動清漣  
臨流鏡非鏡望遠烟非烟萬柳嫩黃金彈弄細似綿  
百草競生意天翁鞭孰先鳥飛茂林得牛放太平暇  
博厚踏此地高明戴彼玄人生萬古內俯來還仰前

醉歌何浩浩一笑興無邊

贈陸清上人

雨霽坐衙軒嘯傲對新竹忽聞山僧來進之令吐臆  
云自鶴駕來巢雲最上嶽龕名是滿月文室月滿白  
結夏絕粒居自許彌天釋起憶小白友翩然一振錫  
行過太守門且爲一言乞我謂爾名何僧言曰陸清  
其意淨陸根乃可以清名借問淨得否欲淨時未能  
陸識既空後淨界身可陵顧名實有愧聊爲行脚僧  
我謂僧來前勿復洛虛說吾道若大路坦然無邪曲  
五倫之所於羣聖之所率上棟而下宇絲身而穀腹



不待入潑山平地有至樂甚矣佛者祖其髮不足擢  
紛紛誣愚駭萬古同受惑畢竟就灰寂爾罪誰得贖  
韓公送文暢其旨最醇實爾欲從吾師誦此最爲急  
亦曰虛而靈萬應隨事活擴前聖未發晦翁功卓越  
冗中贈躋語所契在潑密去去復爲人莫尋鶴山窟

雙清堂次坡仙韻

甲辰四月初九日  
遊清涼山時

萬物天地內擾擾各殊形今年始讀易乃知求同聲  
誰能倚市門學爲狗蠅營我欲登清涼下看老人星  
傾河作春酒一醉雙臉頰姮娥向我笑吳剛飲風稜  
泰山一圭土未足稱崢嶸披心達九閭玉皇應大驚

區區夸集子嚇鼠誇相勝何如遊物外獨立是豪英  
克一菴風穴

孤雲未仙也千載稱其賢我輩亦免俗舉世誰知仙  
俯視三山塊浩嘯清涼顛何勞拜木公留詩動萬年

夢想菴次太白韻

十五  
日

仙山超次寥如遊上九霄何異天台路飄飄渡石橋  
忽憶羨門子三山儻一招

蓮花峯

四月蓮花峯分明似芙蓉天風吹不動海月照還丰  
我本愛蓮者霞外倚孤筇越女豈敢採萬古君子容



光風臺

石崙寺西角有石天作臺  
日月光先照清風萬里來  
名之曰光風一笑雲霧開  
我欲樽南海北斗以爲杯  
一洗萬古醉卧何悽哉

鳳頭巖

白鳳下九天何代集茲山  
千年化爲石羽毛散人間  
依然欲舉頭頭重莓苔斑  
噴雲注時雨幾慰蒼生癯  
遲爾一舉翼吾驂遊八寰

贈鑿師金遂良

玄天父萬物生意何肫肫  
茫漫大腔內於物都是仁

泛愛均衆蠢矧茲吾靈人癢痾在麼子憫視惟健親  
皇矣亦何言惻隱心誠純帝炎古聖君默契良有神  
恭惟愛物心如得承諄諄百草試一嘗妙用齊甘辛  
良藥活四海而無天瘥民遂令億兆黔同謠壽域春  
世遠術亦訛羣方充棟塵紛紛冒衣食內鍊多表銀  
妄投詎已病嗚呼幾誤身聞君有神方和扁何足倫  
視疾諒透垣欲諱難逃真冥心事鍼石妙劑匪襲因  
談笑去癭癰奚翅屈指伸骨疽與內癰沉痾瘳千呻  
諸公競作歌滿櫝珠璣新早知錐脫穎經幄爭薦陳  
勅使誨羣蠢吃吃徒勞唇由來不能喻何異老斲輪



官微身似鷦鷯道貴心如麟高名滿宇內薄祿難救貧  
嗟余學整國有淚空沾巾

送趙叅判伯高以聖節使如京

麟之生問生何遲遲生草不曾踐生虫安履為有角  
亦不觸我知祥無疑雖無豺虎疾恐被狐狸欺遲遲  
莫云晚生必應聖時

右麟之生

鳳于飛初下朝陽儀和聲吐宇宙百鳥爭相追早知  
覽德輝五羽光陸離銜圖向日邊天子當大奇好云  
王者瑞為陳清風詩

右鳳于飛

七月初三日記事

漢城府叅軍姓名金德龍來傳堂上意請達 明主  
宮去夜四更初石隕白嶽峯廣如屋三間三分霄殿  
空波恐驚 太內聲聞于都中偶墜積雨餘何必問  
伯宗一奏 二聖驚命省史宦同小石豈無補一一  
警言堯衷微臣髮如雪會見民時雍

用雲岡韻贈申漬

雲岡天下士雍容動中禮新詩播宇內萬古真一洗  
吳華薛張王繼作皆出倫况我蘇鄭申文章妙入神  
為爾各有贈異光發小用男兒若虛過於生竟無益  
不知亦何愠自有諸公詩餘金書未了江水浩無涯



茅茨只容膝有堂何用歸寂寂學鍾王還吟陶柳詞

題安岳友蓮堂

悵雨塵煩歎霽空銷羣陰愛月坐虛閣不記良夜涼  
光風泛荷葉國香通幽襟寂感妙無邊浩浩君子心  
所樂有存焉濂翁真知音友之一張琴聊作友蓮吟

商山次別黃仲舉

老懷如老蚕逢君吐緒滾朱絃不必奏自解我洋心  
離腸澁水泉嗚咽難成吟長安相憶日回首阻千岑

武陵雜稿卷之一

別集



武陵雜稿卷之二

別集

詩

負帝入海圖

大洋茫茫山一點山前一葉龍舟孤孽虜鼓叻期一  
吞胡戈百萬環海隅背負黃袍溺者誰大宋忠臣陸  
秀夫目擊青史尚隕血何人更教寫爲圖當年夫子  
蓋世豪隻手直欲崑崙扶勤王十載技冤淚朝衣濕  
盡雙眸枯只將華夏載一舸凜凜大義驚八區偷生  
只爲一塊肉有膝忍顏離庭趨倉黃海門樵汲絕晝  
戰夜守恒執爰吁嗟天意不助順乾坤盡屬胡羯奴

寧懷天子入碧波  
不忍青衣迎醜胡  
精忠下徹清冷  
宮哀怨上逗青雲  
攢結為山岳  
鳴為雷烈烈正氣無  
時無

河梁泣別圖

陰雲漠漠白日寒  
霜風拂草黃埃飛  
一人手握漢帝  
節一人身著戎王衣  
臨別荒郊血相視  
天地改色山  
河悲分明知是蘇與李  
萬古一欽還一譏  
龍眠作圖  
豈無意于長宮死  
昧其非

送种放還山

种侯大名天地間  
四海翹首望鳳鸞  
一朝幅巾入帝



城風儀簡重超華  
礎崇政殿上達民瘼  
至尊含笑羣卿嘆  
如何此日不肯住  
掉頭更向終南山  
知君富貴視犧牛  
泉石烟霞盟益頑  
三間草屋碧溪傍  
入夢柿栗紅爛斑  
飄然幽興逸襟靈  
還著荷裳佩椒蘭  
皎皎白駒誰得繫  
冥冥勁翮飛雲端  
愧余未解食玉法  
青衫走肉塵埃間  
秋風西路晚菊香  
一杯相別唱陽關  
山中不可久淹留  
衰職有關蒼生艱

弘文館古風

玉堂岩堯丹庭西  
朱欄影落恩波裏  
班行清切重文雅  
選簡濟濟皆拔萃  
經帷日承三接寵  
講廟道學陳

仁義唐虞典謨討精一三代禮樂究終始郁郁斯文  
誠在茲固知館額非虛美殷勤寄語館中人不負  
國家委任意攻文解讀固爲陋致君堯舜方可貴

望之欲訪李正卿余使望之坐語正卿草堂佳  
致走筆以寄正卿

吾聞三韓之北契丹南萬古鬱律長白山龍飛鳳舞  
東南來佳氣盡向華嶽盤華嶽右臂仁王峯峯前碧  
溪蒼松間千年謫仙覩天秘鑿開青嶂構其端洞壑  
窈窕而瀟灑滿園筠桂雜以蘭誰信城市有大隱碧  
玉壺中自安閒古今上下與四方千里萬里方寸寬



興來健倒金屈卮水崖雪積春入顏百年知己一張  
琴掃榻孤坐門常關丈夫樂地有如此何必區區慕  
大官試問天下脅肩人處士草堂安不安

奉送閔監司耆叟

壽千赴江原道

三韓以來萬萬古天生大聖治東方當年西伯不足  
多日具而食猶未遑明公早負經濟才所學之富兮  
吾不知其幾千萬倉涵泳道德散為文章翩如彩鳳  
自九霄銜圖下為王者祥朝趨金華省暮入白玉堂  
直言壽國脉雄筆潤邦光一生耻論秦漢後上討五  
帝與三王曾司喉舌宣絲綸羣卿歎服兮儒林仰望

關東地磽耕者鮮樂歲苦稀田野荒何況今年喪方  
伯猿猴舞手兮狐狸騰驤我后東顧正如傷不惜大  
惠專一疆爰命我公往欽哉金章映日兮玉節輝煌  
公今攬轡向關外和如春風兮威如秋霜大兒周君  
顛小兒漢范滂磊磊事業軒天地俯仰古今獨翱翔  
老兔有三窟失據應彷徨吾聞東界之海浩無涯怙  
怙之山磨穹蒼公氣凜如山崔嵬公量濶於海汪洋  
詢咨有暇山海間收得萬篇饒錦囊願公先除蝨賊  
輩勿使民病入膏肓願公先禁逐末徒盡令民俗趨  
耕桑願公當先重學校由來多士興庠序梅有標兮



雀無角再見蔽芾之甘棠願公拾取扶桑如瓮繭歸  
來補我舜衣裳

河不出圖歎

河之水兮空沄沄圖不出兮日已暮日已暮兮可奈  
何庖羲遠兮不相遇有眼不見文明祥吾道已矣天  
不顧遑遑歷聘七十國嗚呼此計無乃誤文王旣歿  
文在茲周公爲鬼誰與晤

八陣圖

一德鳴條有莘老六韜牧野磻溪夫誰言萬古夔江  
上復有孔明八陣圖孔明矯矯人中龍德行真箇伊

呂徒躬耕南陽詠梁甫  
晉晉獨樂同唐虞中山大耳  
真帝宵視曹如鬼孫如孤  
草廬三顧禮已勤翻然爲  
起陳訐謨堪嗟未集漸臺  
凶先王弓劍遺鼎湖只許  
孤臣寄大事鬱鬱不忍安  
一堦出師兩表貫日月平  
沙磧壘還縈紆風義妙契  
將無同經緯神籌奇正俱  
仲達但畏奇才者桓溫安  
知陣勢乎千年峽濤轉不  
得石可轉兮江亦枯若使  
當年騁公志功業豈帝墟  
魏吳舊物未復星已隕天  
荒運去非由吾堂堂大義  
凜若生嗚呼餘子皆欺孤

偃月堂



青天有月來幾時何人偃月名其堂堂中所息亦何  
事嗒然隱几對月光明月高高在九天流光皎皎照  
肺腸不愧于月况畏天鬼域一笑人被殃廣平已逝  
北江去皇家一朝殺三王當時言路立仗馬宮中指  
鹿唯十郎楊花撩亂四海搖小堂作崇幾亾唐君不  
見周叔輔幼主伊衡事成湯思兼納溝夜繼日千古  
萬古同流芳

鵲嶺歌送尹經歷赴松都

鵲嶺峩峩松尚青名墟王氣安在哉自從禹鼎遷邾  
鄆獨有山石空崔嵬麗王宮殿悉離離何況王孫歌

舞臺憶昔三韓一塗炭麗祖起除蒼生災操難搏鴨  
談笑耳旋乾轉坤何雄才雍容垂統鑄太平青丘萬  
里笙歌開在後尋孫不嗣德儉德墮地侈心來貪聲  
押伎斲國脈雕牆峻宇窮民財男山甲第若鱗錯幾  
人爲直幾邪回五百年來若瓦解顯陵冤氣行晴雷  
延福巖前春水腥滿月臺下秋蟲哀送君古都歌孔  
悲慷慨淚滴鵝黃杯尊君一城誰不惜天意猶矜舊  
俗顏革去汙染在此行莫遣君馬多徘徊

贈眉叟

三韓五百王者作文教遠邇仁波洽宋君才調亦應



生眼底乾坤猶是挾筆力不獨扛九鼎詞源早能傾  
三峽百年許身豈偶然一心憂國長恰恰發憤積學  
怒如飢光陰幾回惜羊腍一朝聲譽徹九重弱冠桂  
枝頭上插自此文章日以肆騁恠馳奇皆有法翩如  
鸞鳳止朝陽瑣瑣餘子同鵝鴨凜如千將射牛斗霜  
刃映日新開匣溫如美玉一片潤勇如鐵騎三萬甲  
又如溟鵬搏九萬扶搖忽借風一筴又如長鯨在碧  
海萬里波濤一口歛又如蛟龍始奮澤又如虎豹初  
出柙三年濡墨香案前朝為百疏暮千劄東坡山谷  
不足駕子厚退之猶可壓從來華國斯文柄畢竟天

與其入壓黃金屋裏 賜讀書白書開卷門長牖  
曾中文字富千萬往往緒餘振余乏嗟君所得有如此  
顧我區區何所挾自愧無能食 國惠應被傍人笑  
呀呬天涯負郭二頃田早晚秣刺躬畚鍤

書堂有感

日落東湖暝烟沉我興南望愁衆岑  
思親憫兄恨崢嶸無從熱淚橫  
淫淫門前江水千萬斛豈能澆我方  
寸心火急呼兒謀酒來松醪滿盃  
可以斟廣寒仙子早着鞭冰輪  
忽湧蒼冥潏香霧霏霏入樓寒  
玉杯烟烟涵桂林痛飲狂歌起徘徊清風萬里來濯襟天幕



高張江練淨幽人何處彈瑤琴俄頃頑雲妬佳輝雖  
欲麾之不可禁安得束此萬丈箒騰身掃盡長天陰  
姮娥玉兔當大悅爭以靈藥效其忱半獻金闕半  
萱堂北極南極長如今

忭怛山姑射子戲贈辛崱

搏桑右界青未了萬古獨稱忭怛山一萬八千蓮花  
峯別有天地非人間其中焯灼姑射子爲我一笑開  
朱顏珠簾玉案翡翠屏仙宮洞房本不關我欲一躍  
鳳凰翎月下琅然聽佩環爲報市上玉方平碧玉壺  
中今尚閒一念且復三千齡豈空遠避羣仙詵

寄贈友人

新羅萬古形勝地實維我國之南紀紛紛瓜割捲歸  
一霧列雄州七十二地廣民稠浩溥牒觀風治劇須  
得使專宣方伯亦云重佐幕得俊誠不易拔公散騎  
付明選名高斗北誰敢擬幾年遊宦遠膝下滿把當  
歸歸未遂他人謂屈公失喜所喜只在慈闈邇歸去  
山南又湖南榮養到此知無愧皇華駐處觀者密爭  
遺舊日香案吏今之方面古大雅筆法文章真拔萃  
君歸定應成兩美嶺外好管澄清志驅馳原濕問疾  
苦民戴一天無怨詈孰云南方號難治政簡且覺還



無事更值秋期入湖嶠丹崖瑤草撩客思頭流正  
眞面目天王傑卓橫紫翠直巖石奇絕天所假粧點秋  
來極嫵媚怯馬輕衫遊兩閒遣興寧廢一小技驪珠  
滿目綴新篇散落南中泣魑魅詩鞍到處似賈胡紀  
行亦賦南征紀歸來曾次雲夢寬老夫應當一頭避  
從君執鞭亦無嘆安得兩腋生羽翅賴有南鴻飛不  
斷請君頻繫尺素寄

送友人效山谷

送君以懷英之雲慰君以子猷之竹酌君以杜康之  
酒送君以淵明之菊雲搖搖兮子起孝竹青青兮人

不俗酒臨別兮解離愁菊冒霜兮含晚馥秋風千里  
幾駐馬回首一憶南山屋

奉送尹承旨以管押使如京

文孝德業草木知惜哉九原不可作明公曾中幾萬  
里泰山一毫海一勺少小已有乃翁風昂昂獨立難  
羣鶴平步青雲入翰苑未死奸諛皆棄曉登臺秋霜  
夏隕庭上披春風冬吹閣或待掖下掌絲綸或按海  
隅驅蛟鰐蔚然但望虎鳳躍游刃到處無盤錯奉使  
天子須哲人乃命我公管輅路十月九日向燕薊道  
左早寒風雪虐鵲綠江濶水龍鱗丁威柱下凍死雀



間關往還路八千惟公視之跬步若吾聞昔日觀周  
者孔先問禮札問樂後來使者何足數當時上國猶  
糟粕文明萬古復幽都白日勻天奏韶濩都俞揖遜  
藹一堂夔龍元凱相酬酢公行所得不可量仰追孔  
札應無忤禮爲身幹敬是基請贐二字無乃約願公  
東歸正雅頌潤色我邦施丹雘

湖上醉歌次放翁韻

頭毛浦口把酒船高歌待月心茫然初如明鏡湧綠  
烟轉疑玉盤飛青天人間百慮盡棄捐何處鐵笛驚  
龍眠玄裳孤鶴來翩翩晏然呼我瀛洲仙留我朱顏

三萬年俯視六合生哀憐  
塵從玉皇翠水邊一摘瑤  
池十丈蓮

雜詠次東坡韻

深屋無人香縷細白日寂寂門常閉  
床頭橫置一張琴風清北窓涼生  
袂興來開尊輒自酌城市獨饒山  
林計日展黃卷對古人抵老此樂  
爲可繼塵埃幾人病夏畦一生  
脅肩霜滿鬢安得騰身九萬里  
渺渺俯視人間世

又次前韻

秋毫爲大太山細開者未開閉不閉  
天公正如小兒



戲萬事翻覆風前被愚者勞生百年內枉生千謀與  
萬計我願尊中酒不空門前佳客來相繼放浪形骸  
宇宙間脫帽不記靈臺髻地與天蓋且未辨醉裏那  
復知有世

征夫嘆

黑雲壓天白日晦北風欲吹陰山倒漢兵銜枚赴靈  
壁渡河三軍一夜老腰下白劍凍將折鐵衣冷滾冰  
生抱千年戰場浩無垠舊骨成沙新骨槁去歲萬夫  
陷祁連今歲何處塗肝腦主將貪功喜生釁年年出  
師榆關道敗書不報捷書奏士卒悶默空心擣九重

天子豈不聖萬里冤魂那得保不願沒為虜中人祇  
願歸為漢家草將軍未封戰無已仰面長嘯崩蒼昊  
贈懷正人次孫道源韻

雷師早發菩提期一餅來掛蒼檜枝憫看世人愁自  
纏無異老蚕工吐絲何年得詩孫興公玄辯如雲眼  
藍碧師乎莫誇氣彌天我亦狂吟四海客

訪青谷寺都會諸生次壁上牧隱韻走筆留贈  
碧雲羅寺訪諸生入門高壁滿斜陽風流留詠李穎  
叔鳥沒山空溪筑長當時賓主轉雷處晴日筆底風  
雨涼流年一百七十四

公之題在乙巳余之續貂在戊戌

白頭老我



來傾觴舉頸相望歎如昨居僧一莞睂宇黃蒲團假  
寐省晨鐘照佛青熒傳燈光回薄萬古不盈掬一穗  
又燒沉水香

驪興朝發次簡齋陳留韻

迎賓朝旭滿窓扉三嚙下樓行恐遲烟波浩渺齊棹  
去早於昨日乘船時中流回首望 英陵恣恣鬱鬱  
雲氣奇孤臣有淚一洒襟青山無語還惜離梨湖老  
魂不得招筆力當年山可移龍門勢大欲浮天穎叔  
傑句今誰追一江光景慣沿汴瞪目此翁還不癡阿  
咸把管我云云題步簡齋翻成詩乾坤萬古流不舍

再拜此江真吾師

戲寄吳仁遠

去年貧猶可說民喫糠實與松皮今年貧不可說吾  
叔自食來尋期白雲洞裏雲常滿雲消月出光轉奇  
高歌竹溪濯纓歸一般此味人鮮知情親不敢不告  
也曲肱樂亦在於斯

春郊偶吟

野青知麥長天碧覺雲消淑氣融如許魚潛鳥自高

偶吟

海日侵窓赤山風擊榻清一天雲歛碧春草滿庭青



竹洞曉詠

夢覺風生竹窓虛月滿衣高吟仍起坐蜀魄叫桐枝

寄眉叟

公以不貪爲寶於詩亦未免矣聊報二

十字以激新語之教

明月滿湖樓虛窓人獨宿夜撥潭底珠棄盡驪龍櫓  
在東湖書堂寄關西柳評事六絕

湖水日西流懷人歎不已君臨西海頭應見東湖水  
潭裏有雙魚欲傳尺素書見余愈入深我意當何如  
北鴈帶邊聲南窓中夜起不傳繫足書悵望空千里  
夢君在我傍覺數關山路悄悄夜還風蕭蕭晴亦雨

腰鳴三尺劍腹有五車書定遠早投筆英風吹起予  
忠臣不忘親孝子還憂國知爾長勞心願君慎飲食

江樓夜坐

東峯月欲吐西浦寒烟多知有南州客舟人解楚歌

江上三絕

野曠天垂碧樓高水送涼幽人琴始弄明月又窺床  
月臨秋漢淨風入碧梧鳴夜久獨憑檻而無人世情  
月落曉雲生漁歌聞一聲欲尋擊舟處還訝猜塵纓

讀大學有感

人心如皎月物欲若埃塵最愛明明德須知日日新



幽谷驛樓次壁上韻

家國路之半思親亦戀君憑欄天欲暮南北此心

分

東亭醉別朴國禎二首

昇疾東亭晚離君恨若何片心千萬緒一緒不曾邪  
茲亭凡幾送古往又今來海渴山平後更携何處杯  
敬送遂初學士兼帶執義向安邊

白日中天明吾王見萬里贐行不愧貧一貫聞夫

子

錢有貫於贐  
似切故云

贈曹仲

幽入秋毫內時出六合外於遊恐未盡願承高人誨

江樓三絕

日日登江樓俯見江水流流水本無息吾道亦悠悠  
極目望南天天遠山嶙峋白雲日暮起其下有吾親  
豈不戀吾親其奈明主恩寄書南飛鴈落日空沾

巾

送韓命昌

志士如無已高山亦可移臨分一言贈情重酒千卮

題毛良驛樓

登樓吊亡國高枕睡初成綠樹清風足黃公喚一聲



吟風瀨

底石噓雲寂浮花出洞潑臨流聊洗耳勝事自供吟

泚筆巖

撐天須聳骨送雨轉生涼休說頑冥甚陰功協彼蒼

詠松

奉天臺石上三尺一株松獨立飽風雪知渠萬木宗

別申元祿

爲學師源水論交取兕觥相規唯十字庶悉百年情

醉中口呼示東老二首

風敲響淇竹秋老裂安榴汲澗甘烹粥題詩筆不留

我是浮休子君應謫仙人相看兩不厭一心唯二身

又示東老

客裏身南北尊前興古今逢君一夜話倒盡百年襟

主敬吟

恭敬如形影表恭由內敬書紳貴子張叅倚方言行  
榆川驛醉呈宣慰使羅正承

落日榆川驛秋風萬里情平生無盡意流水不停行  
新校明倫堂與河生對酌

雨過豐基郡雲埋鶴駕山千年名教地一盞亦開顏

題朴正郎子龍宅二首



一來叨玉局贏得客中間懶闢窓三板應嫌看後山  
小樓天遠大高卧一何閒狂客醉歸去月輪初吐山

山海亭贈曹捷仲植

幽屋青山下三江入海門無窮看動處獨識靜爲尊  
寄清道安太古

一望蒼然色雲門太古顏休言人不見猶得見茲山  
醉醒亭

亭以醉醒名誰知君子情古今雲變態天地一江清  
三足堂

堂胡三足名不答有餘情山色擎天卓江流貫地清

偶吟

風暄昌樂驛花滿太平村太守狂如點鳴琴送嶺雲

寡言

寡言愈寡欲緩急觀其神責已薄責人感應知其真  
聞惡

聞惡當內省見賢須急齊有爲亦若是在已匪他俟  
次呈黃諫議敬甫五首 惠什五絕雋永邁古鹽  
手薺薇露展詠圭復令人洒然披霧嘗怪古人  
稱薺薇者皆形容其紅紫獨吾海邦所見無非  
黃色豈非君家花耶兼致微意詞極陋拙正可



發一笑

晶光初曝日異馥合通天難和陽春曲呼兒覓酒錢  
月出黃雲低風來麝萬萼遙知有謫仙半夜騎黃鶴  
猩血人爭歌黃裳吾獨喜無風亦自香所貴固如是  
色正息無邪香繁德不爽縱然兄視梅語品百花上  
桃李徒矜色芝蘭讓不芳君家花有此勿復擬黃楊

偶吟

世俗尊金帶吾人有玉髯浮生知足貴夜夜夢茅簷  
次贈柳提學叔春

東閣寒暄意金閨夙夜心傳書喜歸鴈見月又孤吟

贈裴侃二首

詩蔽無邪思學苦毋自欺片心如霽月百世可爲師  
須視言如堇當知不苟賢爲仁曰敬謹二字汝念旃  
龍官別權貽壽

一身天地內渺渺小秋臺學得吾爲大男兒到處豪  
醴泉送博還鄉寄示子翰二首

醴泉追送汝汝去我猶留戀豈非羈鳥歸心洛水流  
微官解縛人行止不由身在夢于山柏朝離淚滿巾

于山卽  
先塋

景濂亭



山立祇祇邑溪行疊疊聲幽人心有會夜半倚孤亭  
與益也閏五月二十四日夜對坐豐城衙軒適  
大雨悄然感舊仍詠窓外三更雨燈前萬里心  
之句各以五字分韻賦之余得窓外三更雨五

首

甲辰

半夜孤燈客荒城冷雨窓魂飛南國梓有淚獨翻江  
爾有九苞姿螟蛉余愧誨優游孔室中莫厭孫山外  
人生有良貴天地并爲三珍重聖孫教至誠是指南  
莎雞初振羽凍雨襲寒更歲運如流水迢迢今古情  
膝上百年祠悠悠含太古一彈孤鳳吟燈下淚如雨

孤山寺

寺在禮安癸卯冬方伯在安東令先往

鞠囚欲往清涼山聞使行徑至宿此而歸

一宿孤山寺祇園桂檜蒼清涼雲未躡心地已清涼

白雪峯

欲到白雲寺先尋白雪峯巉岩擎白日常有白雲封

霽月臺

白雲寺門外平石半天開客到滿臺月因呼霽月臺

新院途中衝霧有感二首

丙午年良月初旬路廣州午時猶霧暗立馬一搔頭  
霧暗日無輝天寒吾有歸不分人十步猶望國沾衣



陽智縣寄李喜益

郭外遠相送連宵相憶情南天看漸近欲作老人星  
銀臺戲示同僚

玉署髯如玉銀臺髯似銀何年上黃閣黃髮亦紛紛  
題扇面自箴

舉德師山甫能恭友机生獨行無愧影方得踐吾形  
示黃仲舉

日臨兼照月魚躍又飛鶩男子平生事要求學聖賢  
次梨湖韻贈玄師

巢松露鶴頻警作蜚桑蚕自纏已把片心寂滅更將

何物相傳

次申清仲韻

洞徹靈臺本不昏  
有時烟起自成雲  
青天露盡風吹後  
一月臨空照萬紛

次魚無迹韻

折松樊圃竹為扉  
石逕苔深馬迹稀  
一樹好花猶悔植  
山蜂擾亂咽香歸

寄崔直長沼先

奉分江上來千里  
嶺路丹楓幾憶君  
孤夢每勞華岳下  
此身猶卧月明村



景釀臺次李希中韻 二首

一角巾頭萬里天蒼崖對立二騷仙長歌自發千年興水底魚龍亦破眠

衆鳥高飛破瞑烟長江一帶暮天邊銀盃共對金絲贈醉裏風情倒謫仙

棲白月山南白寺燈下有感

滿盞膏油太半然懸知夜入四更邊欲將達曙窮今古為夢高堂掩卷眠

棲南磊寺寄許槐塢

便腹禪宮懶讀書開窓日日望君居青驄不出門前

路病眼臨風有刺如

棲餘航山義林寺

米蕨手邊晨露綠  
剪刀未石泉明歸來茶罷松窓  
下明月一庭山鳥聲

寄希中西行

關山千里馬蹄強  
白雪乾坤浩肺腸  
景釀臺前一勺  
水東流不盡我懷長

次熹庵韻贈槐塲四首

千里行舟返故基  
二年南地送花時  
夢魂不渡麗江  
水林下何曾聽是非



八十投竿尚未遲男兒行道豈無時  
長安舊識皆肥馬獨釣寒江帶雨歸

納納乾坤白鷺身逍遙江海養天真  
平生不入樊籠裏笑殺西州鸚鵡馴

青龍爽氣入懷濃白月山光照海隅  
清夜與君談罷後十年鄙吝一時無

在院中有感

故園南望隔千山天末白雲揮淚看  
若使羽毛生兩腋此時飛去拜慈顏

偶吟

甫富猶期途萬里前情邈矣恐難追生平但得依歸處不用車騎眩婦兒

自問

息親日日望南天天盡雲低淚涌泉不是功名能繫足問渠何事苦留連

醉睡南床姜仲思自山來喚驚覺卧吟

不勝紅塵迷兩眼每多夫子讀伽藍頽然晝寢君休喚猶倚孤眠夢嶺南

行過峽中思兄痛哭口占

山翠霏霏雲冪冪林蟬嘒嘒水潺潺此生無復成三



樂痛哭吾行宇宙間

偶吟

日暮開窓獨振衣雲從何處蔽天飛誰知一理昭融  
裏便有無窮變化機

聞雞有感得發字

孜孜爲善舜吾師一嘯開窓江滿月笑殺當年起舞  
人區區血氣空疽發

聞鴈有感

閉戶一生仁義學遠遊端擬致明王如何夜夜南飛  
鴈每引羈思向故鄉

望雲

緊緊風聲作意秋  
經年遊子思悠悠  
白雲片片天南  
極何片正當萱屋頭

夜吟示眉叟

三首

燈下論文欲二更  
無端踈雪打窓聲  
如何江上南飛  
鴈又起遊人萬里情

萬恨年來自飽更  
聊因世外聽江聲  
青燈不是無心  
者照得吾曹一笑情

此坐要須達五更  
君詩擲地盡金聲  
千年樹穴撥環  
是寫出當時宋玉情



蕭何

諸將紛紛盡狗功當時發縱一蕭公如何捨典收秦  
律謾使劉家雜霸風

書匡仲竹屏

抱節長身直以端此君真壓大夫官誰知耿介磯頭  
立終作周家濟世竿

清夜書懷

月明霜重綾衾冷清夜漫漫夢不成料得乾坤今古  
遠一生爲善可長鳴

酬魚舍人

泳濟

進亦多憂退亦憂出非為顯隱非幽吾 君明聖天  
應祚夫子寧留水國秋

途中卽事

冬雨連旬路變溪凍僅朝涉向天啼却言夏旱民無  
粒欲問天心不可梯

贈假注書

天上仙居十二樓殷勤寄藥舊同稠從今田海看朝  
暮未老當添十屋籌

登讀書堂樓

吹竽兩載慣登樓湖上今朝又一秋自是予心多間



斷開眸愈愧俯長流

金叔藝以三絕見寄次報

懶向時人覓賞音  
釣魚還笑大鉤任  
高詞一唱能潑  
省誰習齊咻笑越吟

月下尋君亦已遲  
逢場那記桂花移  
碧天如許浮雲

盡到此相看兩不疑

前夜予訪金月下夜深乃罷

南國雲山萬疊遮  
思親見月意偏多  
清光發處天機  
靜為君何惜奏洋裁

次東坡韻

四首

半歲東湖隔玉清  
眼中羣木盡飄零  
芒鞋踏遍蒼厓

石何日絲絢侍 禁庭

聖情宵旰軫飢寒天愛吾 君警旱乾聞道西郊親  
省歛還嗟未著扈臣冠

終日支頤嗒忘言山禽欺我啄寒軒平生望道長如  
渴萬里江猶一口吞

悠悠萬古樓前水匪懈朝宗夙夜心已許東湖爲益  
友尋師欲到北溟濱

送尹伯和隨親如京 二首

隨親萬里渡遼江男子一身忠孝雙莫用文章動中  
國須將禮義重東邦



松都箕圖兩丘看西入中原萬里關應是鳳雛隨鳳  
去自天猗得瑞圖還

月下携壺餞全文卿如京醉書僂面爲別

一壺來餞月明中月色遙應萬里同西望知君長嘯  
處晴虹夜夜斗星東

謝子淨惠炬于家

寒家炊玉桂爲爨宴食何嘗食有魚多謝故人銀燭  
惠小奴來報黑甜餘

讀汲黯傳

簪纓濟濟漢西京社稷貞臣一汲生却願拾遺留不

得可憐天子慕虛名

書堂卽事

寂歷空齋白日靜  
窓前多事珍禽鳴  
幽人對坐忘言久  
一笑猶傳萬古情

次前韻書懷示洪道原

我如小器長憂溢  
君似洪鐘會大鳴  
休怪他山共崑玉  
百年猶有切磋情

至後以新曆寄宗兄

故園南望雪岑稠  
立送行人凍淚流  
曆至定應先告

廟聖恩如海報無由



以新曆寄從弟有感

客中偏感一陽生  
千里看雲憶弟情  
三載于今鵲鵲  
怨夢魂長繞惠連行

雪後訪鄭彥毅百行階前雪竹一叢凝碧可愛  
遂吟三絕其一贈彥毅其二醉戲彥毅其三百  
行求詩而應賦皆用首韻

彥毅堂前雪滿階  
春心獨在孤叢竹  
客來莫道味無  
珍須信此君佳勝肉

孤竹人中之鄭君  
鄭君雪裏之孤竹  
客來跨鶴向楊  
州堪笑朱門餘酒肉

百行枉求七字詩題詩着殺雪中竹欲知百行百年  
懷愛竹無心慕食肉

酬公叔

醉裏偏驚玉字詩醒來又得玉人詞君家新醪排檐  
雨我就寧嫌拍手兒

寄許南仲草堂

瀟洒東崖一草堂冬如春暖夏猶涼主人高卧閒無  
事俯挹長安萬戶祥

江上聞笛次友人韻

月滿長天萬里秋江雲銷盡水空流一聲鐵笛來何



處木葉先零白鷺洲

書堂卽事 二首

滿腹幽懷不可刪憑欄終日看青山青山向我如相  
慰故吐閒雲教我閒

風驅細雨漁村暗雲霽遙空落照明悟到龍眠難盡  
處倚欄高詠有餘情

舟中次盜齋韻 九首

蒲江風露正淒清三十華顛雪萬莖催老非關作詩  
苦閑然如霧未全晴

西海連天滾復滾孤舟獨去要窮尋蒼溟若許斟吾

罽滿目佳看是衆岑

落日蓬窓手自開山懷水興浩相催誰知一葉扁舟  
上収載人間萬景來

並岸漁家問幾村村應是吸靈源頻呼三老催飛  
棹僂欲乘風出海門

南山紫翠鎖寒松欲賦松高愧闕茸萬古王城襟漢  
水遙瞻佳氣自重重

雨洗長空玉宇晴江餘殘照錦紋生張帆直下楊花  
渡試上蠶頭待月明

十里平湖淨曳紈始尋滄海學觀瀾偶然料得堯夫



興月上天心桂露團

天爲吾幕水爲羶月滿孤舟無限邊  
何事玉人吹鐵笛桂香飄落酒尊前

一派天河接大洋乘槎直欲訪扶桑  
扶桑西岸多仙窟玉洞桃林是我鄉

讀韓休傳

韓休爲相明皇瘦韓休罷相明皇肥  
一人肥來萬方瘠兩京索莫胡塵飛

觀捕蟹

日曝東江徹底寒秋深郭索下長灘  
輕舸漁子持叉

網一引波間輒一歡

讀顏真卿傳

唐家濟濟幾英英  
笏盈朝義氣生  
堪笑薊門波漬  
日屹然砥柱一真卿

萬景臺次李公

連東韻

老鰲擎出海頭臺  
一上飄如駕鶴來  
欲向東溟酌元  
氣天教北斗作吾杯

烈山縣次鄭公

樞韻

碧海觀瀾慕子長  
高堂扇枕愧黃香  
那堪戀闕重惆  
悵北望千山正夕陽



明波驛次鄭公韻

晚雨纖纖不滿空  
鷗飛兩兩夕陽中  
郵亭五月海棠  
盡倦客歡迎船  
棹風

寧越次板上韻醉贈魚清源

泳津

郡在烟霞玉洞中  
至今民俗有淳風  
人間事事隨雲  
變江上青山萬古同

三陟浦亭奉次德水李相韻

漁戶蕭條枕海家  
門前猶見水無涯  
艱哀滿目誠難  
忍官府催魚慎莫苛

商山途中有感

緬懷沙伐吾宗國百代墳塋何處尋山川如舊人非  
是立馬悲吟涕滿襟

次襄陽南軒韻

孤燈細雨淚潺湲戀主恩親入夢難白髮已慚忠  
孝事望窮南北眼空寒

毛良驛次趙相浚韻

羅廢于今六百秋青山依舊拱孤樓當時遺跡憑誰  
問獨立蒼茫意轉悠

題清河臨溟閣

奇觀萬里登高閣倦客三年賦遠遊若倒東溟側北



斗樓中風景可相酬

次灌園丈人韻

樓前風浪海光怪樓後雲烟山吸噓引臂欲擎東日出危欄正近玉皇居

過天吼山

一望襄州天吼峯驚看萬壘鍊芙蓉穿雲欲訪金剛窟應有仙人玉雪容

舟中聞鶯

八月黃鶯轉暮林綿蠻巧舌似春音舟中行客空三歎獨倚烏檣作楚吟

過中原呈牧伯

經過華館投寒驛千里寧親一步要小子何嘗忘杜  
母割雞當日政垂髫

將抵耶山上灌老

萬古耶岑未了青孤雲何處訪丁寧叨恩不惜山行  
費乞句須教慰嶽靈

登馬峴始望耶山

訪山尋水策蹇驢始望耶顏轉起予漸入仙關如瞰  
蔗應知疊穎競迎車

題詩石次孤雲韻



漱激清泉疊疊巒由來此地是仙間孤雲一去無尋  
處只有浮花流出山

道中卽事

看山聽水口吟詠信馬雲中得得來心上已無塵一  
點回頭人世便生哀

贈竹軒上人

躡雲共上仰山頂指點羣岑蟻垤看儒釋他年功就  
後莫教收效愧茲山

贈玄曦上人

看山共爾圓音閣雨裏千峯活盡新龍取壯觀題贈

爾他時憶我費哦呻

途中口占 六首

下馬溪邊日欲西  
纖鱗一一數鯪魚  
哀憐不忍垂吾釣  
坐石還堪讀我書

荒村茅屋兩三家  
寂寞矮簷映落霞  
林下誰知棲隱者  
耦耕爲樂奈渠何

頭戴玄天足履黃  
男兒意氣要雄長  
哦詩奉贈吾宗姪  
每惜居諸望立揚

白髮溪翁耨石田  
黎肌日午汗如泉  
秋來輸租身應餓  
却願生逢大有年



落日溪邊生晚涼黃雲滿野麥傳香春來南郡多流  
殍餅餌今應萬口嘗

尋水披簑暫卸鞍題詩酌酒興將闌携家會入鹿門  
去爲學休言祿可干

又十首

入山三日慣看山滿袖山雲得意還歸卧竹窓無一  
事詠山應復與君閒

仙澗泠泠入耳清客行終日洗塵情他年若躡孤雲  
迹我輩風流也不輕

十年瘦馬厭西東幾日溪山憶剡中遊遍耶山還出

洞此身輕似御冷風

馱着蹇驢索句時白雲橫度碧山遲  
山中倘得參寥輩結友吾寧效謝支

山中春草綠芊芊遠憶崔侯便黯然  
獨悶高丘無美女若人來隱肯貪仙

一入珠林三日留雲山爲我露頭頭  
今朝始出紅泥洞忘却人間萬事浮

寒溪奏筑斷還連病客行吟出洞天  
何處喚來摩詰手寫吾覓句過溪邊

山拱天垂四面青誰教濃綠畫新屏  
騷人一望難禁



興駐馬孤村茂樹亭


細塍如綺稻抽針幽興西疇亦可尋  
鋤芳莫辭歸帶月農家風味此時滋

爲題風景強濡毫狂語年來不厭高  
囊裏盡收耶岳去風流如我亦仙豪

武陵雜稿卷之二

別集









新

陳

張

示